



## Klimautfordringane må takast på alvor

Store overvintringsskadar, fuktig og sein vår og flaum i mange vassdrag har gjeve bønder store utfordringar i våronna. Dette kjem etter fleire år med vanskelege værtilhøve for landbruket. Låge avlingar skapar store problem og mange bønder vert hardt råka økonomisk. Få dagar med lagelege tilhøve gjer det naudsynt med meir samarbeid om produksjon og transport av fôr. Årsmøtet i Norges Bondelag oppmodar Norsk Landbruksrådgivning og samvirkeorganisasjonane om å samordne desse oppgåvane og såleis sikre førtilgangen over heile landet.

Årsmøtet i Norges Bondelag krev at konsekvensane av eit endra klima må takast på alvor med fleire og betre førebyggjande tiltak. Matjord og bygningar må sikrast mot flaum og andre konsekvensar av auka nedbørsmengde. Det er heilt naudsynt med meir og betre drenering. Vassdragsregulering og opprensing etter flaum må skje slik at ein unngår ny flaumskade på dyrka mark. Næringsa treng òg betre erstatningsordningar og arbeidet med den nye naturskadelova må fullførast no.

Årsmøtet i Norges Bondelag har stor medkjensle med dei som er råka av det krevjande været. Me har alle eit ansvar for å bry oss om og hjelpe dei som treng det.